

*Regio.**Nomina prisca**& recētia, a qui-**bus & cur indita**Situs.**Cæli temperies.**Animalium va-*
rietas.

HIBERNIA Insula sequitur, Orpheo, Aristoteli & Claudiano *Ierna*, Iuvenali & Mela *Iuvernica*, Diode-
ro Siculo *Iris*, Eustathio *Vernia* & *Bernia*, incolis *Erin*, Britannis *Iverdhou*, Anglis *Ireland*. Vnde hæc
profluxerint nomina, variæ ut in re obscura subinde enata sunt opiniones. Hiberniam alii ab Hiberno
Duce Hispano, qui primus magna Hominum coactâ multitudine, eam occupavit, dictam volunt: ab
Ibero fluvio alii, quod illius accolæ primi Insulam habitaverint; alii ab hiberno tempore, quia ad Occidentem
vergit: Eulogii author ab Irnalpho Duce. *Hibernia* & *Iuvernica*, proculdubio ab Orphei & Aristotelis *Ierna* di-
manarunt: *Ierna* autem illa, *Iris*, *Iverdhou*, & *Ireland*, ab Incolarum *Erin*. Ab *Erin* ergo gentis vocabulo etymon
petendum. Hic Camdenus quid opinione augurari possit se habere negat: nisi forsan, inquit, sit ab *Hiere* Hi-
bernica voce illis Occasum, sive plagâ Occidentalem sonante, unde *Erin* quasi Occidentalis Regio deducta vi-
deatur. Protenditur hæc Insula ab Austro in Aquilonem, forma lenticulari, sive ovali, non viginti dierum na-
vigatione, ut Philæmon apud Ptolemæum tradidit, sed cccc tamun mill. pass. Latitudine vix cc implet, Ab Ortu
habet Britanniam, a qua Mari Hibernico & unius tantum diei navigatione discluditur. Ab Occidente vastum
Oceanum. A Septentrione, qua Oceanus Deucaledonius quem Ptolemæus vocat *Hyperboreum*, irrupit, ha-
bet Islandiam: ab Austro respicit Hispaniâ. Aër hujus Insulæ est saluberrimus, Cælum mite, clemens, blâdum,
nam neque æstivo calore Incolæ ad umbras & loca opaca impelluntur: neque frigore ad focos; semina tamē ob
Autumni humiditatem rarius maturescunt. Hinc Mela scribit, Cælum ad maturanda semina iniquum habere.
Salubritate tamen & serenitate aëris multum Britannia præstat. Terræ motus hic numquam, vix semel in anno
tonitru audies. Regio gleba præpingui, uberique frugum proventu felix est: pascuis tamen quam frugibus, gra-
mine quam grano fecundior. Tritici namque grana sunt hic contracta & minuta, & vix alicujus vanni bene-
ficio purganda. Quod ver gignit, æstas nutrit, vix in messe pluvialis aquositas colligi permittit. Æolicis nam-
que flatibus, & pluvialibus inundationibus præ aliis terris hæc exuberat. *Verum* (ut inquit Mela) adeo luxurio-
sa herbis non latet modo, sed etiam dulcibus, ut si exigua diei parte pecora se impleant, & nisi pabulo prohibeantur, diutius
pasta dissiliant. Quod etiam Solinus de hac Insula testatur. Hinc pecorum infinita multitudo, primæ & præ-
cipuæ Incolarum opes, Ovium etiam greges plurimi, quas quotannis bis tondent. Equi item optimi (*Hobies* vo-
cantur) quibus non idem qui cæteris in cursu gradus, sed mollis alterno crurum explicatu glomeratio. Nullum
ibi reptile degit, nullus Serpens, privilegio cum Creta communi: sæpe etiam illuc de Britannia allati Serpentes,
mox ut proximantes terris odorem aëris illius attraxerunt, intereunt. Beda testis est, vidisse se, quibusdam a Ser-
pente percussis raso folia codicum ex Hibernia asportatorum propinata esse, & continuo totam vim grassantis ve-
neni, tumoremque inflati corporis recessisse. Falcones præterea, Accipitres & Nisos, præ aliis regionibus copio-
se producit. Aquilarum quoque non minor hic copia, quam alibi milvorum. Tanta vero multitudine se Grues
ingerunt, ut uno in grege centum frequenter reperias. In Boreali plagâ Cygni etiam abundant. Ciconiæ ve-
ro per universam Insulam rarissimæ sunt, & illæ nigrae. Perdices, Phasiani, Picæ & Philomelæ deesse dicuntur.

Apum